

# Bayaran balik PTPK ditangguh 3 bulan lagi

**Putrajaya:** Kerajaan bersetuju untuk melanjutkan penangguhan bayaran balik pinjaman Perbadanan Tabung Pembangunan Kemahiran (PTPK) tiga bulan lagi, mulai 1 Oktober sehingga 31 Disember ini.

Menteri Sumber Manusia, Datuk Seri M Saravanan, berkata jumlah terbabit susulan penangguhan bayaran pinjaman untuk tempoh tiga bulan itu dianggarkan bernilai RM70 juta dan bakal memberi manfaat kepada 178,906 peminjam.

"Penangguhan bayaran balik pinjaman PTPK ini secara automatik tanpa perlu membuat permohonan penangguhan sebelum ini," katanya dalam satu kenyataan, semalam.

Penangguhan untuk tiga bulan itu juga selaras pengumuman Perdana Menteri, Tan Sri Muhyiddin Yassin pada 29 Julai lalu mengenai lanjutan moratorium dan bantuan bank bersasar untuk melindungi dan mengurangkan beban rakyat dalam menghadapi cabaran pandemik COVID-19.

Saravanan berkata, anggaran penangguhan bayaran balik pinjaman PTPK secara keseluruhan berjumlah RM220 juta sehingga 31 Disember ini, membabitkan 178,906 peminjam.

Pada 27 Mac lalu, Muhyiddin mengumumkan penangguhan bayaran balik pinjaman PTPK untuk tempoh enam bulan mulai 1 April hingga 30 September berjumlah RM149.2 juta membabitkan 174,500 peminjam, di bawah pakej Rangsangan Ekonomi Prihatin Rakyat (PRIHATIN).

BERNAMA